

Urriaren 27an
URTEAN ZEHARREKO 30. IGANDEA

Agurra

Munduaren argia dugun Jesus Jauna izan bedi zuekin.

Sarrerako oharpena

Jaunaren eguna eta Elizaren eguna da Igandea: Jainkoak bildu gaitu bere mahaian. Bere erruki mugagabea gugana heltzea nahi du. Berak ezagutzen du gure bihotza eta berri^{tu} gaitu nahi gaitu gaur ere.

Damu-otoitza

Berritasun hori onartzeko, apaltasunez aitor dezagun gure bekatua.

—Jesus Jauna, bihozbera eta errukisua zarena. Erruki, Jauna.

—Jesus Jauna, on eginez igaro zinena. Kristo, erruki.

—Jesus Jauna, inor galtzerik nahi ez duzuna. Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara

Otoitza

**Jainko ahalguztidun betierekoa,
handitu guban sinesmena, itxaropena eta maitasuna;
eta zure agintzariak iristeko,
egizu, maita ditzagula zure aginduak.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta Errege bizi baita gizaldi eta gizaldietan.**

Hitzaren liturgiari oharpena

Gizartearen begietan ezer gutxi balio dutenak, baztertuak eta behartsuak: horiek ditu gogokoen Jainkoak. Barnera dezagun bere Hitza, bere antzeko egin gaitzan.

Lehenengo irakurgaia (*Sir 35, 15b-17. 20-22a*)

Siraken liburutik

Jainko zuzena da Jauna, inoren bereizkuntzarik egiten ez duena. Ez du bereizkuntzarik egiten behartsuen kontra, eta entzuten du zapalduaren otoitza. Ez du gutxiesten, ez umezurtzaren eskabiderik, ez erreguka ari zaion alargunarenik. Haien nahigabeek beren aldera ekartzen dute Jauna, eta haien otoitza hodeietaraino igotzen da. Behartsuaren otoitzak hodeiak zulatzen ditu, eta ez du onik, Jainkoarengana iritsi arte; ez du etsitzen, Jainkoak entzuten dion arte eta epaile zuzenak zuzenbide egiten dion arte.

Erantzun-salmoa (*Sal 33, 2-3. 17-18. 19 eta 23*)



Bedeinka dezadan aldi oro Jauna,
nire ahoan beti Haren gorespena.
Gailendu bekit bihotza Jaunarekin,
poztu bitez apalak hori entzutearekin. R/.

Gaizkileen aurka Jaunaren aurpegia,
gal dadin lurrean haien oroipena.
Zintzoek dei egin zioten, eta Jaunak entzun,
estualdi guztitik atera zituen bere eskuz. R/.



Hurbil dute Jauna bihotz urratuek,
salbatzen ditu barrenez atsekabetuak.
Jaunak askatzen ditu bere morroiak,
ez du izango zigorrik Harengana ihes doanak. R/.

Bigarren irakurgaia (2 Tm 4, 6-8. 16-17)

San Paulo Apostoluak Timoteori

Anaia maite: Neure odola isurtzeko zorian nago ni; nireak laster egingo du. Borroka ona egin dut, ibilaldia bukatu dut, gorde dut sinesmena. Orain prestaturik dago niretzat zuzentasunaren koroa, Jaunak, epaile zuzenak, egun hartan emango didana; ez, ordea, niri bakarrik; baita Haren etorrera maite duten guztiei ere.

Zatozkit lehenbaitlehen. Nire lehenengo auzian bakarrik utzi ninduten denek; ez zitzaidan inor alde atera. Jainkoak barka biezaie. Baina Jauna nire alde nuen eta Berak indartu ninduen, berri on osoa nire bidez zabal zedin eta herri guztiek entzun zezaten.

Aleluia (2 Ko 5, 19a. c)



Jaungoikoa mundua Berekin adiskidetzen ari zen Kristorengan
eta guri eman zigun adiskidetzearen hitza. R/.

Ebanjelioa (Lk 18, 9-14)

Homiliarako argibideak

Apala goratua izango da

Pertsona askok ez dute otoitz egiten. Ez otoitz egiten ez dakitelako edo otoitzak gogoratzen ez dituztelako bakarrik, denbora galtzea iruditzen zaielako baizik. Baliteke Jainkoan sinestea oraindik, baina ez dute harekin inolako harreman pertsonalik, auren bizitzarekin ez duela zerikusirik uste baitute. Bere fedearen arabera otoitz egiten du bakoitzak, duen Jainkoaren irudiaren arabera. Farisauak teologia farisearraren arabera otoitz egiten du (Lk 18, 9-14). Baliteke ebanjelioek judu talde horri buruz transmititzen diguten irudia kristau-judu polemikak baldintzatuta egotea. Jesusen garaiko fariseoek zintzoak ematen zuten, eta, kasu gehienetan, benetako harremana zuten Jainkoarekin, gainera.

Ebanjelioak aipatzen duen fariseoa garai orotako farisearra da eta erlijio guztietan eta erlijiorik ez dutenetan ere badago. Horixe bera gertatzen da zergalari edo publikanoaren irudiarekin ere, bekatariarekin, alegia. Farisearra ezin hobea da Legearen aurrean eta, horregatik, justifikatuta dago Jainkoaren aurrean. Eskerrak emateko egiten duen otoitza bere buruari eskaintzen dio, Jainkoari baino gehiago. Bere Jainkoa legalismoa da. Farisearrak bere farisear bizitzan bezala otoitz egiten du, tente, aurrean, denek ikusteko moduko lekuan. Bere jainkoaren aurrean ez jartzen, baizik eta bekatariarekin konparatzean, publikanoarekin, agertzen da haren Jainkoaren faltsukeria. Farisearraren Jainkoa Legaren alde eta bekatarien aurka dago. Ez duenez bere burua bekatari aitortzen, bidezko baizik, ez ditu Jainkoaren **barkamena** eta justifikazioa jasotzen. Horregatik, bere bekatuarekin itzuliko da etxera, bere otoitzarekin larriagotutako bekatuarekin.

Publikanoak, berriz, publikano modura otoitz egiten du, bekataria modura. Atzean geratzen da, kolpeak ematen ditu bular aldean, eta apaltasunez eskatzen dio barkamena Jainkoari. Publikanoa Jainkoaren aurrean kokatzen da, ez Legearen aurrean. Bekatariei abegi egiten dien Jainko errukitsu batean sinesten du. Bere parabolan, bekatariei abegi eginda eta haiekin bazkalduta presente egiten den Jaikoaz mintzo da Jesus. Publikanoak bekataria aitortuko du bere burua eta barkamena eskatuko du, eta Jainkoak barkatu eta justifikatu egingo du, pertsona zuzen bihurtuko du. Guztiz **eraldatuta** itzuliko da etxera. Jainkoak bere otoitza entzun du, bere barkamen eskaera onartu du (*Si* 35, 12-14. 16-18). Jesus bezala, barkamen sakramentu izan behar du Elizak, ez du inor zigortu behar.

San Lukasen ondorio orokor bat ateratzen du bere elkartearantz. "Bere burua goratzen duena apaldua izango da, bere burua apaltzen duena goratua izango da". Santa Teresak "egian ibiltzea" deitzen zuen **apaltasuna** bizitzea da gakoa ("humildad es andar en verdad").. Gure egoeraren benetako pertzepzioarekin du zerikusia apaltasunak. Ez da apaltasun xaloa, dena Jainkoagandik jasotzen dugula onartzea baizik. Segur aski, beste pertsona askok baino gaitasun handiagoak ditugu, baina horrek ez gaitu eraman behar besteak mespretxatzera. Guk ez ditugu jaso ditugun dohainak merezi izan, eta besteak ez dira dohain horiek ez jasotzearen errudun. Berak nahi duenari eta berak nahi duen bezala ematen ditu Jainkoak, baina atseginez kentzen ditu boteretsuak tronutik, eta apalak goratzen. Ebanjelioak berekin duen **balio-aldaketa** da.

Jainkoaren aurrean jarri behar dugu, ez Legearen aurrean. Erraza da batek bere burua ontzat jotzea Legea betetzeagatik. Jainkoaren aurrean, Kristoren gurutzearen aurrean, horren barkamen beharrean gaude denok. Izan ere, Kristo Jesusengan barkatu digute. Horregatik, Jesusen otoitza izango da kristauaren otoitza. Aitagurean, labur-labur

ezarri du Jesusek bere teologia. Guztion aita ona da Jainkoa. Gure giza legeekin manipula ezin dugun Jainko santu bat da. Justiziazko eta maitasunezko bere Erregetza ekarri nahi du, baztertuta daudenentzat batik bat. Haren maitasunezko borondatea gizakion bizitzan bete ahal izatea da garrantzitsua. Jainko maitagarri horren esku utz ditzakegu gure bizitza eta bekatuak. Eukaristiak eman diezagula espiritu apal hori, besteak baino gehiago garela ez sinesteko eta gure munduan barkamen eta adiskidetze tresna izateko prest egoteko.

Jainkoaren herriaren otoitza

Jaunari egindako otoitzak Berak bihotz onez entzuten dituela jakinik, egigun otoitz apaltasunez:

- Jaunak indarra eta argitasuna eman diezaien Jose Ignazio gure gotzainari eta Elizako artzain guztiei. Eska diezaiogun Jaunari.
- Neurrigabeko ezberdintasunak gairiditurik, herrietako arduradunak denon ongizatearen alde saia daitezen. Eska diezaiogun Jaunari.
- Sufritzen duten guztiek kristau-elkartearen bidez presente egiten den Jaunaren indarra eta laguntza izan dezaten. Eska diezaiogun Jaunari.
- Hemen bildu garenok eta gure etxeko eta adiskide guztiok, itxaropenez eta elkarri on eginez bizi gaitezen. Eska diezaiogun Jaunari.

Jainko Jauna, Zuk ez diozu begiratzen gizakien ospeari, baizik eta behartsuen alde diharduzu beti; begiraiezaguzu zergalariaren antzera zugana apal agertu nahi dugun Zure zerbitzarioi eta egizu Bera bezala beheraturik Zure erreinuan goratuak izan gaitetzela. Jesu Kristo gure Jaunaren bitartez.

Jaunartze-ondorengo otoitza

**Zure sakramentuok, Jauna,
egin dezatela gudan beroiek adierazten dutena,
orain irudipean egiten duguna
gero egiaz eta osorik har dezagun.
Jesu Kristo gure Jaunaren bitartez.**